

ILUARSISSUTIT

Siunnersuut 22.. oktober 2015-imik ullulerneqartoq taarserpaat

Tunngavilersuut

Akitsuusersugassat inatsisissatut siunnersuummut 19. august 2015-imeersumut sanilliullugu ilaneqarnissaat Naalakkersuisut siunnersuutiginiarlugu aalajangerput.

Taassuma kingunerisaanik allannguutit, matumani aamma isertitassatut naatsorsuutigineqartunik nalileeqqinneq oqaaseqaatini ilanngunneqarput.

Uunga siunnersuut: Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat

Saqqummiussissut

(Aningaasaqarnermut Aatsitassanullu Naalakkersuisoq)

Siullermeerneqarnera

Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnissaa pillugu inatsisissatut siunnersuut, qalerallit immannguaannaq suliat sulierineqanngitsullu akitsuutaannik aamma aalisakkat ikerinnarsiortut ilaasa Tunumi pisarineqartut akitsuutaannik atuutilersitsinissamik imaqartoq Naalakkersuisut sinnerlugit matumuuna saqqummiutissavara. Marluullutik siunertaraat inuiaqatigiit tamattaalluta aalisakkanit pisuussutitsinnit iluanaarutunik amerlanerusunik pissarsinissaannik qulakkeerinisaq.

Qalerallit immannguaannaq suliat sulierineqanngitsullu annissorneqartut akitsuutaannut siunnersuut isornartorsiutaangaatsiarsimavoq, minnerunngitsumik aalisarnermik ingerlatalinnit. Naalakkersuisut Siumut, Demokraatit Atassullu, akitsuutit pillugit isumaqatigiissusiornikut isornartorsiutaasut pillugit eqqartueqatigisimavaat. Naalakkersuisut partiillu taakku pingasut isumaqatigiissutigisimavaat inatsisissatut siunnersuummut tassunga aappassaaneerinninissamut allannguutissatut siunnersuummik saqqummiussiniarlutik. Allannguut naatsukulanngorlugu oqaluttuaralugu tassaavoq qaleralinnut immannguaannaq sulianut sulierineqanngitsunullu akitsuutissaagaluaq qaleralinnut tunisassiarineqartunut akitsuummik taarserneqarnissaa. Nunatta karsianut isertitsissutaasussat allangornatik 20 mio. kr.-iussapput. Naatsorsuutigaara allannguutissatut siunnersuut ullut amerlanngitsut ingerlanerini Inatsisartunut nasinneqarsinnaasoq, taamaalilluni Aningaasaqarnermut Akileraarternermullu Ataatsimiititaliap siunnersuutip isumaliutissiisutaata aappassaaneerinninissamut saqqummiutsinnagu eqqartorsinnaanissaanut periarfissillugu.

Aalisakkanik ikerinnarsiortunik aalisarneq nutaajulluinnarpoq, aalisakkanullu amerlanernut tunngatillugu misileraalluni aalisarnertut suli taaneqarsinnaalluni. Avataasiorluni raajarniarneq, qaleralinniarneq avaleraasartoornerlu kisimik maannakkut akitsuusersugaapput. Aalisakkap ikerinnarsiortup avaleraasartuup isumalluutunik atuinermut akitsuutaata atuutereersup saniatigut taamatuttaaq aamma ammassassuup ammassallu Tunumi pisarineqartup akitsuutaanik atuutilersitsinissaq siunnersuutip kingunerissavaa.

Aalisakkanik ikerinnarsiortunik Kitaani aalisarnerup suli akitsuusersorneqannginnissaa siunnersuutaavoq. Tassunga tunngaviuvoq Kitaani misileraalluni avaleraasartoornerissamut, ammassassuarniarnissamut ammassanniarnissamullu tunngavissat maannakkuugallartoq nalorninartulerujussuunerat. Kitaani aalisarfiit akitsuusersuiffigineqalinnginneranni, siunissami aningaasarsiutiginnissat siunertaralugu aalisarfiusinnaanerat paasiumallugu misissuiffigeqqissaaqqaarneqartariaqarput.

Kalaallinik sulisoqarnissaq angallatitigullu ineriartortitsinissaq annertusarniarlugit, aammalu aalisarnermik ingerlataqartut naammaginatut agguataariffigineqarnissat qulakkeerumallugu siunnersuutigineqarpoq akitsuutit assigiinngitsuussasut, taamaalillutik aalisakkat angallatit Kalaallit Nunaanni angerlarsimaffeqartutut nalunaarsorneqarsimasut atorlugit pisarineqartut, aalisakkanit angallatit Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasut atorlugit pisarineqartunit appasinnerusumik akitsuusersorneqarlutik.

Partiit isumaqatigiipput 2016-ip ingerlanerani aalisarnermi isumalluutitut akitsuut aalisarnermilu inatsisit misissoqqissaarneqassasoq Tassunga aalajangiinissamut tunngavissaq Aningaasanut Inatsimmut atatillugu nioqqutissat naleqassusaanik misissuineramik akuerineqarsimasumik maajimi 2016-imi naatsorsuutigineqarpoq naammassineqassasoq.

Inatsisissatut siunnersuut tassungalu oqaaseqaatit naggataagut innersuussutigaakka.

Taamatut oqaaseqarlunga siunnersuut Naalakkersuisut sinnerlugit matumuuna Inatsisartunut suliassanngortippara, aammalu Aningaasaqarnermut Akileraartarnermullu Ataatsimiititaliami sularineqareerpat aappassaaniigassanngortillugu.